

Foru Parlamentuak bigarren aldiz errefusatu du Alli lehendakargia

HBren botorik gabe, baimena eduki arren Mitxel ez zelako iritsi

Bigarren aldiz gaitzetsi du Nafarroako Parlamentuak Juan Cruz Alli, UPNko lehendakargia. Bere alderdiko 20 botoak izan zituen alde eta PSOE, EA eta IUko 24ak kontra. HBk ez zuen parte hartu bozketan, Zutoia Mitxelen presentzia eragotzi zuen «erabaki politikoa», Zabaletaren hitzetan, salatu nahian.

ANA UNANUE / IRUÑEA

Juan Cruz Alli, Union del Pueblo Navarro alderdiko lehendakargia, huts egin zuen Nafarroako lehendakargitza eskuratzeko bigarren saioan. Atzoko bozketan ere gehien-go absolutoa behar zuen (26 boto) Allik, baina bere alderdiaren hogeitau botoak besterik ez zituen jaso.

Kontrako 24 botoak PSOE (19), EA (3) eta IU(2) alderdietatik etorri ziren. Herri Batasunak berriz ez zuen bozketan parte hartu. Alderdi abertzaleko parlamentarien txanda heldu zenean, Patxi Zabaletak hartu zuen hitza, honako hau adierazteko: «ez dugu parte hartuko, erabaki politiko

batengatik ez dagoelako gure artean Zutoia Mitxel taldekidea».

Zutoia Mitxel, HBko parlamentaria, egun Carabachel-eko gartzelan dago preso eta, hirugarren aldiz, ezin izan du parte hartu Foru Parlamentuko ekitaldi batean. Asteazken eta osteguneko ihardueretan haren presentzia eragotzi zuena Garzon epailearen erabakia izan zen. Ostiralean, ordea, bere kasua Nafarroako Epaitegi Gorenaren esku gelditu zen eta honek berehala eman zuen baimena parlamentariak presondegia utz zezan.

Baimena larunbat goizaldera iritsi zen Madriler, «baina ez zitzaion heldu epaileari, zegokion bezala, baizik eta Carabanchelera zuzenean», Adolfo Araiz, HBko abokatu eta parlamentariak atzo jakin erazi zuenez. Baimena epaileari bidali eta berriro gartzelara heldu zenerako, beranduegi zen eta Zutoia Mitxel goizeko hamarretan oraindik Madril- en zegoen, Parlamentuko bozketaren eguerdian zen arren.

BOTOEN % 30 EUSKARAZ Atzoko bozketak, datorren astean egingo diren beste biak beza-



Allik UPNren botoak bakarrik ditu bere alde.

JOXE

la, ez zuen interes handirik, alderdi guztien botoa alde aurretik ezaguna zelako. Hala ere, Foru Parlamentuan sekula gertatu ez dena gertatu zen: botoen % 30 euskaraz izan ziren. Portzentaia oso garaia da, are gehiago kontuan izanik HBk —euskaldun gehienak biltzen dituen taldeak— ez zuela bozketan parte hartu.

Ezezko botoa euskaraz eman zutenak bederatziz izan ziren —hiru EAKoak eta gainerakoak IU edo PSOEkoak— eta euskarazko baiez-

koa eman zutenak sei —denak UPNkoak alegia, alderdi horrek parlamentari euskaldunik ez duen arren—. Datorren astean, izango dira Juan Cruz Alliren azkeneko bi bozketak. Horieta aski du eskuindarrak gehien-go soilarekin, hau da, kontra baino alde boto gehiago jasotzea. Hala eta guztiz, UPNkoak ez du oraingo lehendakargitza eskuratzeko betarik izango, IU, EA eta PSOEren 24 botoak kontra izango dituela ziurtat jo daiteke eta.

PSOE eta EAK negoziaketei berrekin diete, gobernu egitasmoa zehazteko

A.U. / IRUÑEA

PSN-PSOE eta EAK berriz ekin zieten herenegun Alliren inbestidura zela eta etendako negoziaketei. Abuztuan lehendakargitza lortzeko Urralburuk egingo duen saioari begira, gobernu egitasmoa ari dira zehazten. Horretaz mintzatu gara Fermin Ziaurritz, EAKo bozeramailearekin.


EGUNKARIA.— Nola doaz negoziaketak eta non daude zailtasunak?

ZIAURRIZ.— Akordiotara heldu gara azpiegitura eta lurraldearen antolamendu arloetan, baina benetako zailtasunak ekar ditzaketen gaietan ez dugu gehiegi aurreratu. Ez da negoziaketa erraza, abiapuntu desberdinak ditugulako. Nahiz eta zenbait gizarte gaitan ados egon, Nafarroako zenbait arazo zehatz oso modu desberdinean ulertzen ditugula argi dago eta sozialistek ere zerbaitetan amore eman beharko dute, guk egitasmoa onartu ahal izateko.

EGUNKARIA.— Euskararen Legearen aldaketa nahitaezko eskaera izango da?

ZIAURRIZ.— Hori ikusiko da. Baina argi dago ez gaudela prest aurreko Gobernuak egin duen hizkuntz politika ametzteko. Euskararen Legeak jartzen dituen zenbait muga kendu behar dira eta hori izango da, gure helburu nagusienetakoa.

EGUNKARIA.— Dena dela, HBren



Fermin Ziaurritz.

JOXE

abstentziorik gabe, alferrikakoak dira negoziaketa hauek.

ZIAURRIZ.— Guk, koherentziaz eta hauteslegoarekin hartutako konpromezuagatik, esfortzu hori egin behar dugu. Esfortzuen emaitzak bozketaren egunean ezagutuko dira. HBk kontrako botoa ematen badu, berak erantzun beharko du. Baina eskuineko Gobernuari alternatiba bat emate-

tera behartuak gaude, alderdi aurrerakoa eta abertzalea garen partetik.

EGUNKARIA.— Zeuen botoen truk zerbait eskatzen duzuen bezala, ulertzekoa da HBk ere zerbait eskatzea. Zergatik ixten zaizkie haiei ateak?

ZIAURRIZ.— Konplexua da, ez HBk bere sei parlamentariarekin Parlamentuan egin dezakeenagatik, baizik eta HBk orokorrean indarkeriaz duen jarreragatik. Hori hesi gaindiezina da. Gu akordio batera helduz gero, gure gobernu egitasmoa erakutsiko diegu eta beraiek ikusi beharko dute UPNrena baino hobea den ala ez, oraingoz negoziaketarako ahalmenik ez bait dute. Ahalmen hori erakundeetara egunero etorritik lortzen da eta HB hori egiteko prest dagoen ikustear dago. Ildo horretatik, interesgarria da lehengoan Zabaletak egin zuen diskurtsoa, Arbeloak duela lau urte egin zuenaren aldean, oso desberdina. Hitzegin zuen, eta ongi deritzot, Nafarroaren arazoez: nekazaritza, hizkuntz politika, ingurugiroa... Jarrera horri eutsiz gero, behin baino gehiagotan egingo dugu bat. Hori dudarik gabe, baina aurretik ez badigute esaten instituziotan parte hartzea iraunkorra edo normalizatu izango den, zein diren haien helburuak, erabaki instituzionalak onartuko al dituzten, hitz batean, ez badigute esaten joko demokratikoa osotasunean onartzeko prest dauden, ezin dute gehiago espero.

PSOE eta EAK «denbora alferrik galtzen dute», HBren iritziz

A.U. / IRUÑEA

PSN-PSOE «ez luke denbora alferrik galdu behar Eusko Alkartasunarekin, aurrerabideko benetako politikaz hitzegiteko gurekin mintzatu behar du eta», adierazi zuten atzo Herri Batasunako ordezkari nafarrek.

HBkoek ez zuten onartu gobernu eskuindar bat eragotzearen erantzukizuna beraiena denik, «zeren eta gu hitzegiteko prest gaude —Adolfo Araizen esanetan—, gobernu ezkertiarra bultzatzeko negoziatzeko prest gaude eta PSOErena da erantzukizuna, HBrekin esertzetik nahi ez badu».

PSOE eta HBren artean harreman berririk —ez ofizial, ezta ezkuturik ere— ez dela egon ziurtatu ondoren, «ekimena sozialistei dagokie», esan zuen Araiz, «haiek direlako gobernu osatzeko asmoa dutenak».

Maurizio Olite foru parlamentariak, Juan Cruz Alli UPNko lehendakargiaren aurreneko inbestidura saioaren balorazioa egin zuen: «Alli ez da saiatu PSOErekin duen antza ezkutatzeko —Oliteren iritziz—, eta Urralburu izan da itxura desberdina eskaini nahi izan duena».

Urralburuk Allirekin nahi izan zuen enfrontamendua, Oliteren

Araiz:

«Parlamentuari adarra jotzen ari dira»

A.U. / IRUÑEA

Adolfo Araiz, HBko foru parlamentaria eta abokatu, mintzatu zen atzo, Zutoia Mitxelekin izandako arazoak direla eta. Bere esanetan, «Parlamentuari adarra jotzen ari dira eta berari dagokio ekimena hartzea, hiru aldiz eragotzi bait diote parlamentariari sesio batean egotea».

Lehenengo bi kasutan Zutoiaren presentzia eragotzi zuena Garzon epailearen erabakia izan bazen ere, «oraingoa Epaitegiaren baimena dugu eta ez dute bete», azpimarratu zuen abokatuak.

HBko mahai nazionaleko kidearen ustez, arrazoi politikoak daude arazo guzti hauen atzetik. «Uste dugu —Araizen hitzetan— arrazoi politikoak daudela parlamentari hau, euskal preso politikoa izateagatik, Parlamentura etor dadin oztopatzeko». Adolfo Araizen irudiko, PSOE ezin ditu «aitzakia juridikoekin ezkutatu gai honetan dituen erantzukizun politikoak».

Dena den, Mitxelek datorren aste-ko bozketetan parte hartzeko aukera izan dezan, «HBk beharrezko urrats politikoa eta juridikoa guztiak emango dituela» jakin erazi zuen Araiz. Itziar Gomez parlamentariak adierazi duenez, Alliren inbestidura saioan HBk izan duen jokabideak «ez du esan nahi ezinbestez Urralbururen inbestiduran berdin jokatu dugu», orduan Gobernuaren erabakiko da eta.

ustez, «faltua da. Ezin dute orain etsai bezala azaldu, biak urteotan txirrindu berean ibili bait dira».

URRALBURU ETA ESKUINA Urralburuk ezin du «eskuinaren itzulerarekin inor izutu», Herri Batasunakoaren esanetan, «eskuinak inoiz ez duela alde egin Nafarroatik, Urralbururen politika eskuindarren menpe egon bait da beti».

PSOE-UPN esperientzia eza- guturik, sozialistek EArekin negoziatu dezaketen gobernu egitasmoak ez du sinesgarritasunik eskaintzen HBrentzat. «Inork ezin digu eskatu gobernu egitasmo horri oneritzia emateko —Oliteren irudiko—, 1977az geroztik PSOEkin egin duena ikusirik, ez duelako konfidantza izpirik merezi».

Nafarroako Gobernuaren mantentzeko argudio gisa, Urralburuk «aurrerabiderako politikaren jarraipenaren» premia aipatzen duenean, HBren baitan kezka pizten duela ziurtatu zuen Araiz. «Badakigu zein den politika «aurrerakoi» hori, inposaketa arau bihurtu duena —Araizen hitzetan— eta horri eusteko gure laguntza ez duela edukiko jakin beharko luke. Horretarako ez du izango laguntzarik, ez bototan, ezta abstentzio moduan ere».